

समां - 12:25 hrs.

<><><><><><>

### Darbar Move

चंऊ बरें शा मते समें दे अंतराल मगरा परतियै शुरु होए दे दरबार मूव तैहत स्यालै आली राजधानी जम्मू च अज्ज दफ्तर परतियै खुल्ली गे न। मुखमंत्रि उमर अब्दुल्ला हुंदे जम्मू पुज्जने पर बपारियें ते मुकामी लोके उंदा गर्मजोशी कन्नै सोआगत कीता। संदोख जाहर करदे होई मुखमंत्रि होरें आखेया जे उनें'गी इस गल्लै दी खुशी ऐ जे लोक इस रिवायती प्रथा गी परतियै ब्हाल करने पर खुश न। मगरा सिविल सचिवालय पुज्जने पर उनें'गी औपचारिक तौरा पर गार्ड ऑफ ऑनर बी दिता गया। श्रीनगर च 30 ते 31 अक्टूबर गी बंद होए दे विभाग हून जम्मू थमां अगले 6एं महीने लेई कम्म करगंन।

<><><><><><>

### LG -Security Meet

उप-राज्यपाल मनोज सिन्हा होरें जम्मू-कश्मीर च आतंकवाद दा समूलचा नाश करने लेई 360 डिग्री ज़ाविए आहला रें अपनाने लेई आखेया ऐ। कश्मीर प्रांतै च मजूदा सुरक्षा हालात दी समीक्षा करने लेई सद्दी गेदी इक उच्ची सतह दी बैठक दी अध्यक्षता करदे होई एल.जी होरें जोर देइयै आखेया जे सरबन्धित सब्भनैं अधिकारियें गी जमीनी सतह पर हालात दी कन्नो-कन्नी समीक्षा करदे रौहनी लोड़चदी ते निक्की कोला निक्की नकलो-हरकत पर नेइमी तक्क रखदे होई घाटी चा आतंकवाद दा भलेया खात्मा करने गितै तयार

रौहना चाहिदा। मनोज सिन्हा होरें अधिकारियें कन्नै गल्लबात करदे होई सुरक्षा हालात दे बक्ख-बक्ख पहलुएं बारे तफसीली चर्चा कीती ते आतंकवाद मुक्त जम्मू-कश्मीर दे लक्ष गी हासल करने लेई किट्ठे रलियै जतन करने दा आहवान कीता।

<><><><><><>

Jhiri Mela Prep

कल 4 नवम्बर गी शुरु होआ'रदे उत्तर भारत दे सब्भनै शा बड्डे लोक मेले चा इक “झिड़ी” दे मेले गितै त्यारियें गी मुकदा रुप दिता जा'रदा ऐ। मेले गी पूरी चाल्ली रमानदारी ते बवस्था आहले ढंगै सिर तोड़ चाढ़ना जकीनी बनाने लेई प्रशासन बक्ख-बक्ख मैहकमे ते एजेंसियें कन्नै नेड़मा तालमेल बनाइयै कम्म करा'रदा ऐ-जेहदे च सुरक्षा बंदोबस्त-भीड़ प्रबंधन-गड्डियें दी आओ-जाई ते खडेरने दी बवस्था सने आपात स्थिति दौरान कीती जाने आहली कारवाई वगैरा दे प्रबंध बी शामिल न। जम्मू-कश्मीर दे इलावा देसै दे बाकी राज्यें थमां औने आहले लोकें दे आकर्षण ते मनोरंजन लेई सांस्कृतिक कार्यक्रम-पारम्परिक छिंज- चहूटे- खाने-पीने ते खरीददारी दे सम्यान दे स्टॉल लग्गी चुके दे न। पुलिस- सिविल प्रशासन-फौज ते नीम फौजी बल आपू च नेड़मां तालमेल बनाइयै कम्म करा'रदे न। मेले दा उदघाटन उपराज्यपाल मनोज सिन्हा होर करगंन।

<><><><><><>

जम्मू दे डिवीजनल कमीशनर रमेश कुमार होरें किश्तवाड़ दे मचेल दा दौरा लाया- तां जे हाल च गै बद्दल फटने दे परैन्त चला'रदे विकास ते पुर्नब्हाली दे कम्में दा जायजा लैता जाई सकै। जिले दे सीनियर अफसरें कन्नै गल्लबात करदे होई उ'नें चसोती थमां मचेल तगर जारी कम्में दी प्रगति दा जायजा लैता, जिंदे च मचेल भवन, यात्रा परिसर ते यात्री भवन शामिल न। एह सब्बै कम्म सी.एस.आर दे तैहत कीते जा'रदे न। उ'नें दरबार जाने लेई राबता यकीनी करने दे मकसद कन्नै पलाली-मचैल सिड़क परियोजना दा बी मूल्यांकन कीता। डिवीजनल कमीशनर होरें अधिकारियें गी निर्देश दिते जे ओह निर्माण कम्में च तेजी आनन, खराब होए दे बुनियादी ढांचे दी मरम्मत करन ते सैलानियें ते शरदालुएं आस्तै उचित स्थूलतां ते साफ-सफाई यकीनी बनान।

<><><><><><>

## GST Agriculture

करसानें गी बड़्डी राहत दिंदे होई सरकार नै अगली पीढ़ी दे जी.एस.टी सुधारें तैहत कृषि क्षेत्र च टैक्सें च बड़ी मती कटौती कीती ऐ। 1800 सी.सी. शा हेठ दे ट्रैक्टरें पर जी.एस.टी 12 फीसदी शा घटाइयै 5 फीसदी करी दिता गया ऐ, जेहदे कन्नै लौहके ते दरम्यानं दर्जे दे करसानें लेई हून, एह मता किफायती होई गे न। जैव कीटनाटक, पोषक तत्वें, ड्रिप सिंचाई आली प्रणाली, स्प्रींकलर ते राई-बाई च इस्तेमाल होने आली होरनी मशीनें सनें कैई होर कृषि उपकरणों च बी जी.एस.टी गी 12 फीसदी शा घटाइयै 5 फीसदी करी दिता गया

ऐ। अधिकारियें दा आखना ऐ जे एहदे कन्नै फसल उत्पादन च बाददा होग ते भारत दे करसान होर सशक्त बनगन।

<><><><><><>

## Weather

मौसम विभाग दा आखना ऐ जे जम्मू-कश्मीर च 4 ते 5 नवम्बर गी आमतौरा पर मौसम बदलोखड़ा बने दा रौहग ते संझा ते रातीं बेल्लै उच्चे इलाकें च हौली बरखा जां बर्फबारी होने दी मेद ऐ। किश थाहरें पर 4 नवम्बर दी संजा गी अंधी-झक्खड़, बिजली चमकने ते तेज ब्हाएं दे चलने दे आसार न। 5 नवम्बर थमां केई इलाकें च दिनें ते रातीं बेल्लै तापमान च काफी गिरावट औने दा अंदाजा लाया गया ऐ। अधिकारियें सलाह दिती ऐ जे करसानें गी मौसम सरबन्धी नुक्सान थमां बचने लेई 4 ते 5 नवम्बर गी राई-बाई सरबन्धी कम्मैं गी मुअत्तल करी देना लोड़चदा।

<><><><><><>

## Women Cricket

मुख्यै दिए धीएं क्रिकेट च इतिहास रचेआ ऐ। कल राती नवी मुंबई च आई.सी.सी महिला विश्व कप दे फाइनल च भारत नै दक्षिण अफ्रीका गी 52 रन कन्नै हराई पैहली बारी विश्व कप अपने नां कीता ऐ। भारत नै पैहले बल्लेबाजी करदे होई 7 विकेट पर 298 रन्ज पर सिमटी गई। इस जित दे कन्नै मुख्य भरै च खुशी दी लैहर जन द्रौड़ी पेई। उपराज्यपाल मनोज सिन्हा ते मुखमन्त्री उमर अब्दुल्ला होरें बी भारतीय महिला टीम दी

इस उपलब्धि पर खुशी प्रगट करदे होई सब्भनें खडारियें दी ममारकबाद ते शुभकामनीं दितियां न।

<><><><><><>

KGPL

आपरेशन सिंदूर दरान बुरी चाल्ली प्रभावित होए दे जम्मू-कश्मीर दे सरहदी जिले पुंछ च अमन-रमानदारी, खेड्ढ भावना ते नौजोआनें दी हिस्सेदारी गी बढ़ावा देने आहली इक टकोहदी पैहल तैहत भारती सेना नै पुंछ जिले च कब्जा रेखा कश कृष्णा घाटी प्रीमियर लीग दा सरिस्ता कीता। कृष्णा घाटी ब्रिगेड दे कमांडर ब्रिगेडियर अमित होरें इस टूर्नामेंट दा उद्घाटन कीता।

<><><><><><>